
ОЛТИАРИҚ ТУМАНИ ҲОКИМИ БИЛАН БОҒЛИҚ ТАНҚИДИЙ ЧИҚИШЛАР ЮЗАСИДАН ЎРГАНИШ ЎТКАЗИЛАДИ

Ижтимоий тармоқларда Олтиариқ тумани ҳокими Холмирза Ниёзовнинг тумандаги Қизилтепа маҳалласи аҳли билан ахлоққа зид иборалар ишлатилган ҳолда мулоқоти бўлгани иддао этиб тарқатилган видеоларга юзасидан Фарғона вилояти ҳокимлиги томонидан қуйидагилар баён қилинади:

Бугунги кун ҳокими ўз иши билан, сўзи билан, хулқ-атвори билан барчага ўрнатилган бўлиши шарт. Зеро, давлатимиз сиёсати ҳокимлардан одамларни рози қилиб, уларга меҳр бериб ишлашни талаб этмоқда.

Олтиариқ тумани Қизилтепа маҳалласида яшовчиларнинг туман ҳокими улар билан учрашувда ахлоққа зид ибораларни қўллагани, ҳурматсиз муносабатда бўлгани ҳақидаги иддаолари юзасидан ўрганиш олиб бориш учун халқ депутатлари Олтиариқ туман кенгашининг Одоб-ахлоқ комиссияси томонидан ишчи гуруҳ тузилди, ўрганиш натижалари юзасидан қўшимча маълумот берилади.

Аҳолининг туман ҳокими билан боғлиқ танқидий чиқиши объекти бўлган ҳудуддаги масжидни давлат рўйхатидан ўтказиш масаласи бўйича қуйидагиларни келтириб ўтиш лозим:

Мамлакатимизда сўнги йилларда барча соҳалар қаторида диний-маънавий соҳада ҳам ислохотлар жадал амалга ошириб келинмоқда. Жумладан, Ўзбекистон Ислом Университети Халқаро Ислом академиясига айлантирилди, мадрасалар 11 тага етказилди, фикҳ, ҳадис ва ақоид мактаблари фаолияти йўлга қўйилди, Ўзбекистон мусулмонлар идораси тасарруфидаги диний таълим муассасаларига талабаларни қабул қилиш квоталари икки баробарга оширилди. Бундан мақсад - фуқароларимизга Ислом динининг асл моҳиятини кенг тушунтира оладиган имомларни кўплаб тайёрлаб, аҳолининг хизматида йўналтиришдир.

Ушбу ислохотлар натижасида Республикамиз ҳудудида 2019 йил 16 та, 2020 йил 13 та янги масжидлар очилди ва ушбу ишлар давом эттирилмоқда. Ҳозирги кунда Ўзбекистондаги масжидлар сони 2084 тани ташкил этмоқда.

Мана, бир неча кун аввал вилоят Адлия бошқармаси томонидан Ўзбекистон туманидаги “Ўқчи-дашт” МФЙда жойлашган “Ўқчи” масжиди рўйхатдан ўтказилиб, унинг рўйхатдан ўтказилгани тўғрисидаги гувоҳнома топширилди. Бу билан Фарғона вилоятидаги масжидлар сони эса 200 тага етди. Кеча, 26 февраль куни ушбу янги жомеъ масжидда илк жума намози кўтаринки кайфиятда адо қилинди.

Ҳозирги кунда янги масжидларни очишда аввал Ислом динининг асл моҳиятини тушунтира оладиган олий маълумотли имомларни ўқитиш ҳамда очилажак масжиднинг имом-хатиби ва бошқа ходимларини иш ҳақи билан таъминлаш масалалари эътиборга олинаётган бўлиб, мазкур муаммолар ҳал қилиниб борилишига ҳамоҳанг равишда барча ҳудудларда янги масжидларимиз фаолияти йўлга қўйиб борилади.

Бизни ижтимоий тармоқларда кузатинг [Facebook](#),
2021-02-28 11:28:05